

INUIT ATAQATIGIIT

Inatsisartuni



16. september 2019

Inatsisartut Suleriaasianni § 37 imm. 1 naapertorlugu Naalakkersuisunut apeqquq imaattoq matumuuna saqqummiuppara.

Naalakkersuisunut apeqquq:

1. §37_152/2019-imi, apeqquq. 2-mut, Naalakkersuisut akissumminni allapput: *"Tulaanneqartut agguaqatigiissillugu angissusaat, aalisartut angallamminni allattuivii malillugit oqummersamut ataatsimut aalisakkat pisaasartut kiisalu uumassusilerituut kilisaatinik qassutinillu misissuinerinit piffissami pineqartumi aalisagaqatigiit milliartulersimasut takuneqarsinnaavoq. Aalisagaqatigiit milleriaraangamik annerit utoqqaanerillu ikileriarnerinut takussutissaasarpoq, taamaattumillu aalisakkat tulaanneqartut mikinerusarput. Pisassiissutitaqanngitsunik aalisarneq Qeqertarsuup Tunuani aalisarnermut tamarmut ilaammat pisassiissutitaqanngitsunik aalisarneq aalisagaqatigiit ikiliartornerannut aamma peqqutaataavoq."*

Naalakkersuisut tusagassiuutinut nalunaarumminni 7. August 2019 ullulikkami ilaatigut aamma ima allapput: *"Naalakkersuisut siorna aalajangerput aqutsiveqarfinni Qeqertarsuup Tunuani aamma Upernavimmi qaleralittassiissutigineqartut TAC-at, akuerisaasumik pisaarneqarsinnaasut, ilisimatuussutsikkut ukiuni tulliuttuni sisamani innersuussisarnernut naleqqussarneqartalissasut."*

- Taava suna pissutaava Naalakkersuisut 6. September 2019 aalajangermata Qeqertarsuup Tunuani sinerissamut qanittumi qaleralinniarnermi pisassat 2.400 tonsinik ilaneqassasut, taamaasilluni ilisimatuussutsikkut innersuussutigineqartuniit pisassat 5.460 tonsinik amerlanerulissallutik?

2. Nunarput tamaat isigalugu, aammali Qeqertarsuup Tunuani sinerissap qanittuani qaleralinniarneq eqqarsaatigalugu MSC-imik meqqilersuinermut qanoq sunniuteqassava ilisimatuussutsikkut innersuussutigineqartuniit pisassiissutigineqartut maanna 5.460 tonsinik amerlanerulersinneqarmata?

3. Quppernermi uani: <https://naalakkersuisut.gl/kl-GL/Naalakkersuisut/Naalakkersuisoqarfiit/Fiskeri-Fangst-og-Landbrug/Fiskeriafdelingen/TAC-og-kvoter> ilaatigut aamma atuarneqarsinnaavoq *"Pisuussutinik uumassusilinnik atuinermi piujuartitsinermik tunngaveqarluni ingerlatsinissaq Naalakkersuisut pingaartippaat. Tassanilu aalisakkanik pisuussutigut aqutsivigineqarneranni ilaatigut pisassiisarneq ilaavoq."*

- Naalakkersuisut suli isumaqarpat Qeqertarsuup Tunuani qaleralittassanik qaffaaneq piujuartitsinermik tunngaveqarluni aalajangernerusoq?

- 4. Apeqquut 3-mut akissut aappiuppat: Piujuartitsinermi tunngaveqarluni aalajangiineruppat tamanna qanoq Naalakkersuisut tunngavilersorpaat?**
- 5. Naalakkersuisut ulloq 9. September 2019 tusagassiuutitigut nalunaarutaat innersuussutigalugu: Qeqertarsuup Tunuani killilersugaanngitsumik qaleralinniariup taamatut atugaanera qaqugu Naalakkersuisut atorunnaarsissavaat, aammalu aalisarnermut akuersissutit nutaat qaqugu Naalakkersuisut killilissavaat?**

(Inatsisartuni ilaasortaq Sofia Geisler, Inuit Ataqtigiit)

Tunngavilersuut:

Pisuussutit uumassusillit aalisarneqarneranni aqutsinermi tunngaviusut atorneqartut Naalakkersuisut namminneq nittartagaanni allassimasut illuatungerluinnaanik imalimmik Naalakkersuisut aalajangererat kingulleq tupigusuutigaara. Taamaattumik suna tamatumunnga patsisaanersoq paaserusuppara. Pineqartoq tassaavoq inuiaqatigiit aningaasaqarnikkut napatinnerannut pilersueqataasoq pingaarutilerujussuaq. Taamaattumik tamatuminnga allannguissamut pissutaasoq inuiaqatigiinnut sunniutilerujussuusimassaaq, manna tikillugu nalunaarutigisanit allaanerujussuarmik imalimmik Naalakkersuisut aalajangiisimanerannut.

Taamaassimangippat inuiaqatigiit aningaasaqarnerannut innarliingaatsiarsinnaasumik Naalakkersuisut aalajangiisimassapput, allaat innersuussutigineqartuniit 5.000 tonsit sinnerlugit qaangiilluni Qeqertarsuup Tunuani sinerissamut qanittumi qaleralittassanik qaffaasoqarluni.

Kissaatigivara apeqquutikka ullut suliffiusut qulit qaangiutinnginneranni akineqarnissaat.